

babile, id nullo pacto in animo est ætati nostræ ad imitandum proponi.

Cæterum, doctrinam Thomæ Aquinatis studeant magistri a vobis intelligenter lecti in discipulorum animos insinuare, ejusque præ ceteris soliditatem atque excellentiam in perspicuo ponant. Eamdem Academiæ a vobis institutæ aut instituendæ illustrent ac tueantur, et ad grassantium errorum refutationem adhibeant. — Ne autem supposita pro vera, neu corrupta pro sincera bibatur, providete ut sapientia Thomæ ex ipsis ejus fontibus hauriatur, aut saltem ex iis rivis quos ab ipso fonte deductos adhuc integros et illimes decurrere certa et concors doctorum hominum sententia est; sed ab iis qui exinde fluxisse dicuntur, re autem alienis et non salubribus aquis creverunt, adolescentium animos arcendos curate.

Probe autem novimus conatus nostros irritos futuros, nisi communia copta, Venerabiles Fratres, ille secundet, qui *Deus scientiarum* in divinis eloquii¹ appellatur; quibus etiam monemur, *omne datum optimum et omne donum perfectum desursum esse, descendens a Patre luminum*². Et rursus: *Si quis indiget sapientia, postulet a Deo, qui dat omnibus affluenter, et non improporat, et dabitur ei*³. — Igitur hac quoque in re exempla sequamur Doctoris Angelici, qui nunquam se lectioni aut scriptio[n]i dedit, nisi propitiato precibus Deo; quique candide confessus est, quidquid sciret, non tam se studio aut labore suo sibi peperisse, quam divinitus accepisse: ideoque humili et concordi obsecratione Deum simul omnes exoremus, ut in Ecclesiæ filios spiritum scientiæ et intellectus emittat, et aperiatur eis sensum ad intelligendam sapientiam. Atque ad

1. *I Reg.*, II, 3. — 2. *Jac.*, I, 17. — 3. *Ibid.*, V, 5.

uberiores percipiendos divinæ bonitatis fructus, etiam B. Virginis Mariæ, quæ *Sedes Sapientiae* appellatur, efficacissimum patrocinium apud Deum interponite; simulque deprecatores adhibete purissimum Virginis Sponsum B. Josephum, et Petrum ac Paulum Apostolos maximos, qui orbem terrarum, impura errorum lue corruptum, veritate renovarunt, et cœlestis sapientiæ lumine compleverunt.

Denique divini auxilii spe freti, et pastorali vestro studio confisi, Apostolicam benedictionem, cœlestium munerum auspicem et singularis nostræ benevolentiae testem, vobis omnibus, Venerabiles Fratres, universoque Clero et populo singulis commisso peramanter in Domino impertimur.

Datum Romæ, apud S. Petrum, die 4 Augusti ann. 1879, Pontificatus nostri anno secundo.

LEO PP. XIII.

OPERIS RATIO

Doctorem Angelicum, præclaris laudibus adeo celebratum in Litteris Encyclicis SS. DD. Leonis PP. XIII huic operi præfixis, nullis certe novis præconiis auderemus extollere. Decessorum namque suorum verbis amplissimo suo testimonio confirmatis, D. Thomam Aquinatem Magistrum ceteris omnibus antecellentem proclamat sapientissimus Pontifex : dignus plane qui cunctis veritatem inquirentibus hac tenebricosa tempestate talem ac tantum Doctorem proponeret, quippe qui prius etiam quam Magister infallibilis doctrinæ revelatæ divinitus constitueretur, in disciplinis sacris eruditissimus, jam omnium ore Doctor eximius salutabatur.

Pro suo itaque munere gregem Domini pabulo veritatis pascendi, considerans omnes errores ubique grassantes, quibus uterque ordo naturalis et supernaturalis subvertitur, et ratio ipsa in discrimen cum fide simul conjicitur, remedium opportunum quo malo in dies ingravescenti efficaciter mederetur exquisivit.

Jam dissidii causa inter Ecclesiam catholicam et eos qui ementito philosophorum nomine semetipsos honestare non verentur, a Pio IX fuerat denuntiata, cum inter propositiones antea reprobatas sequentem iterum damnavit : « Philosophia tractanda est, nulla supernaturalis revelationis habita ratione! ». Porro, ut Vaticana Synodus decretorie docet, « neque solum

1. Encycl. *Quanta cura*. Prop. xiv damnata in *Syllabo*.

fides et ratio inter se dissidere nunquam possunt, sed opem quoque sibi mutuam ferunt, cum recta ratio fidei fundamenta demonstret, ejusque lumine illustrata, rerum divinarum scientiam excolat; fides vero rationem ab erroribus liberet ac tueatur, eamque multiplici ratione instruat¹.

Ex iis etiam qui studio veritatis revelatae incumbunt, non defuerunt qui disciplinam olim in scholis theologicis usitatam vel contemnentes ut antiquatam et temporibus nostris insufficientem, vel respuentes ut nimis arduam, viam novam et non satis exploratam inierint, et rejectis doctissimorum magistrorum praeceptis, inter scopulos sine duce temere procedentes, in errores omnigenos impegerint, quibus in fide ipsi naufragaverunt, aut saltem doctrinæ catholicae splendorem offuscarunt. Quos censura debita plexit supra laudatus Pontifex, cum alteram hanc propositionem denuo damnavit: « Methodus et principia quibus antiqui doctores scholastici theologiam excoluerunt, temporum nostrorum necessitatibus scientiarumque progressui minime congruunt². »

Quapropter supremus Ecclesiæ Magister Leo XIII, divino spiritu afflatus, nihil intentatum relinquere voluit ut philosophiam, quam pene derelictam vel a rationalismo deturpatam dolebamus, instauraret, et simul theologiam ab erroribus serpentibus præmuniret ac in vias tutiores introduceret. Hoc quidem saluberrimum consilium perfecit, cum ad omnes sacrorum antistites direxit hanc nunquam satis collaudandam Encyclicam superius positam, qua Magistrum et Doctorem præ cæteris commendat D. Thomam, « virum

1. Constit. Dei Filius.

2. In Syllabo prop. XIII.

ingenio docilem et acrem, memoria facilem et tenacem, vitæ integerrimum, veritatis unice amatorem, divina humanaque sapientia prædivitem, soli comparatum, qui orbem terrarum calore fovit et doctrinæ splendore complevit. » Ille est enim qui « veteres doctores sacros quia summe veneratus est, ideo intellectum omnium quodammodo sortitus est. Illorum doctrinas, velut dispersa cujusdam corporis membra, in unum collegit et coamentavit, et magnis incrementis adauxit, ut catholicæ Ecclesiæ singulare præsidium et decus jure meritoque habeatur. »

Non igitur alium ducem sive philosophi sive theologi securius sequentur. Nam « philosophicas conclusiones speculatorus est in rerum rationibus et principiis, quæ quam latissime patent et infinitarum fere veritatum semina suo velut gremio concludunt, a posterioribus magistris opportuno tempore et uberrimo cum fructu aperienda. Quam philosophandi rationem cum in erroribus refutandis pariter adhibuerit, illud a se ipse impetravit, ut et superiorum temporum errores omnes unus debellarit, et ad profligandos qui perpetua vice in posterum exorituri sunt, arma invictissima suppeditarit. Præterea rationem, ut par est, a fide apprime distinguens, utramque tamen amice consocians, utriusque tum jura conservavit, tum dignitati consuluit; ita quidem ut ratio ad humanum fastigium Thomæ pennis evecta, jam fere nequeat sublimius assurgere, neque fides a ratione fere possit plura aut validiora adjumenta præstolari, quam quæ jam est per Thomam consecuta. »

Plurimi jam summi Pontifices, quorum in prædictis litteris nomina recensentur et judicia referuntur, paribus encomiis Angelicum celebraverant. Inter quos noster B. Urbanus V, non laudibus fecisse satis exis-

timans, et supra sua auctoritate præcipiens, non post multos annos ab obitu D. Thomæ ad Academiam Tolosanam scribebat: « Volumus et tenore præsentium vobis injungimus, ut B. Thomæ doctrinam tantum veridicam sectemini, eamdemque studeatis totis viribus ampliare^{1.} »

Decessorum suorum vestigia terens, sapientissimus et SS. DD. Leo XIII hodiernis magistris eorumque discipulis eumdem incomparabilem Doctorem proponit, quem postea, multis episcopis et institutis catholicis efflagitantibus, « patronum declaravit universitatum studiorum, academiarum, lyceorum, scholarum catholicarum, volens eum uti talem ab omnibus haberi, colique observari^{2.} »

Vix autem promulgatis hisce litteris, ubique terrarum homines permulti ingenio atque omni laudum genere florentes, tanti Pontificis voluntati morem continuo gesserunt, animumque et omnes curas alacriter intenderunt, ut Aquinatis sapientia, omnibus tradita, omnibus probaretur, maximique duceretur, præsertim a juvenibus qui tum in cæteris scholis, tum imprimis in seminariis in spem bonam Ecclesiæ succrescunt.

Quod autem ad nos attinet, cum plurimos annos philosophiam primum, deinde theologiam, in Seminario Trecensi docendi munere fungeremur, nihil antiquius habebamus, nihil melius et præstabilius arbitrabamur, quam in singulis quæstionibus enucleandis « doctrinam Thomæ Aquinatis in discipulorum animos insinuare, ejusque præ cæteris soliditatem atque excellentiam ponere, eam ad grassantium errorum refutationem adhibendo^{3.} » Summa igitur jucunditate affecti fui-

1. Constit. v data die 2 aug. 1368 ad Cancell. Univ. Tolos.

2. Breve datum die 4 aug. 1880.

3. In Encycl. suprad.

mus, cum Pastor supremus hanc omnibus altissimam et tutissimam monstravit viam in qua alumnos nostros conanter ducere sategimus. Quamvis autem episcopalibus sollicitudo dehinc pastoralibus curis nos addixerit, non tamen a pristina vocatione nobis omnino recendum esse existimavimus, ideoque, pro modulo nostro, « ad catholicae fidei tutelam et decus, ad societatis bonum, ad scientiarum omnium incrementum, aureæ S. Thomæ sapientiae propagationi^{1.} » iterum incubuimus, res theologicas futuris Christi sacerdotibus, sicut ipse dicit in Prologo suæ *Summae*, « eo modo tradendo secundum quod congruit ad eruditionem incipientium. »

Maxime quidem optandum est « ut sapientia Thomæ ex ipsis ejus fontibus hauriatur^{2.} », scilicet ex ejus libris. Sed, quia haec scripta, quorum intelligentiam plene acquirere possunt ii tantummodo qui perseveranter in eis versantur, nostrorum tyronum capacitem ut plurimum excedunt; cum multæ quæstiones post D. Thomam exortæ sint, quæ quidem ejus principiis solvuntur, sed uberius tractari debent; cum insuper methodo antiquæ alia temporum necessitatibus accommodatior fuerit suffecta: expedit ut in scholis theologicis doctrina Angelici « hauriatur etiam ex iis rivis quos, ab ipso fonte deductos, adhuc integros et illimes decurrere certa et concors doctorum hominum sententia est^{3.} »

Inter eos qui his necessitatibus obviare studuerunt, longe eminet, et ut verius dicatur, cæteris præstat Carolus Renatus Billuart, ex Ordine Prædicatorum,

1. Ibid.

2. Ibid.

3. Ibid.

qui, mediante sæculo superiori, opus notissimum edidit cui titulus : *Summa S. Thomæ hodiernis academiarum moribus accommodata*. Ipse scopum suum exponit his verbis : « Integrum consilium nostrum aperit operis titulus. Non enim novam theologiam condere intendimus, nec id operis genus in quo sub specioso theologiae Thomisticae titulo author proprias opiniones tradit. Mens ipsam puram *Summae Angelicæ* doctrinam exponere, ejus conclusiones asserere, ejus principiis inhærere, ejus distinctionibus objectiones solvere, servato quæstionum ordine, et adhibitis, in quantum licebit, propriis S. Doctoris verbis : omnia hodierna methodo ad usum scholæ. » Non est certe computandus inter eos qui D. Thomæ nomen obtendunt cum ab ejus mente recedant, et non tam opiniones suas Angelici dogmatibus, quam ejus dogmata suis opinionibus aptare nituntur; sed profitetur se sententias Magistri unice amplecti et eas strenue defendere intendisse. Unde ab omnibus theologiae Thomisticae peritis sanctum est quod ipse de proprio foetu fidenter scribit : « Est ergo hujus operis doctrina vere Thomistica, et ideo ex hac parte ab omni errore pura, non declinans neque ad dexteram neque ad sinistram, sed media via, eaque regia et tuta, inter utrinque syrtes incedens. S. Thomæ namque doctrinam summum pene securitatis gradum attingere probant scholæ, clamant pulpitæ, prædicant SS. Pontificum oracula, concinunt conciliorum plausus et sanctiones, et, quod his omnibus majus est, evincit hoc Christi e cruce pendentis elogium : *Bene scripsisti de me, Thoma.* »

Cum vero hæc theologia nimis excederet mensuram operum tyronum manibus tradendorum, author ipse eam ita coarctare voluit, ut *Summa Summae S. Thomæ* inscribi posset. Sed nimis forsitan brevitatis studiosus, non tantum dissertationes doctrinales vel historicas non

necessarias expunxit, verum plures quæstiones magni momenti et etiam tractatus integros qui nullimode hodie omitti posse videntur resecavit : unde hujus operis, aliunde præstantissimi, valor notabiliter fuit imminutus. Insuper plura sunt capita quæ a tempore quo Billuart scribebat in manualia scholastica introduci debuere, ad refellendos recentiores errores e rationalismo natos. Hæc omnia quæ deerant vel restituimus vel addidimus, mutuatis sæpe ab authore ipso quæ non satis consulte a *Compendio* rejecerat, cæteris proprio nostro labore conscriptis, ita tamen ut prolixitatem simul et nimiam concisionem declinaremus. In paucis, et quidem non majoris momenti, ab ejus sententiis dogmaticis recessimus. In moralibus vero, quamvis ipse testatus sit se inter rigorismum et laxismum incedere voluisse, ejus vestigiis pedetentim instare nobis non semper licuit, eo quod principiis quæ ejus ævo in scholis gallicis communiter vigebant plus æquo imbutus, ad quamdam severitatem magis quam ad justam benignitatem inclinatus fuerit. In his Ligonianam doctrinam, nulla censura dignam a S. Sede declaratam, anteposuimus. Cæterum in omnibus nobis solempne fuit textum primitivum integre servare, ut argumenta utrinque pugnantia præ oculis lectoris semper haberentur.

Quidquid scripserimus, nihil est quod non sit haussum ex principiis ipsius Doctoris Angelici, a quo vel minimum deflectere nobis piacularē fuisset. Post Billuart ergo et cum ipso, quod ad nos spectat, jure possumus dicere : « Ecce, benevole lector, ipsum S. Thomam tibi ubique loquentem, te constanter docentem, alia solum methodo diversum exhibemus, quandoque fusius ubi ille brevius, quandoque brevius ubi ille fusius, pro variis temporum congruentiis; et dum expendimus quæ omnino tacuit, sive in *Summa*, sive in

aliis operibus, ad hæc enim etiam non raro confugimus, ea a primariis ejus discipulis mutuamus. »

Postquam authoritatis episcopalnis censorio judicio hoc opus subjecimus, cum nostro Billuart sincera mente dicimus : « Sanctæ Sedis judicium pro lydio lapide in re theologica habemus. Et ideo quæ hucusque scripsimus, et quæ deinceps scribere continget, ejus correctioni humiliter ac devote subjicimus, ita quod, si quædam improbet, ex nunc pro non dictis haberí velimus. »

His utere et fruere, lector, et, si tibi profuisse hoc opus fauste contigerit, Dei misericordiæ nos commenda.

P.-F. E.

SUMMA

SUMMÆ S. THOMÆ

*Ema
Oct. - 24 - 1924*

PROœMIUM

DE NATURA ET DOTIBUS THEOLOGIÆ

D. Thomas, I p. q. 1.

I. THEOLOGIA, secundum nominis etymologiam, est sermo de Deo, sic dicta a duplice voce græca θεός λόγος; secundum nominis significationem, est doctrina rerum divinarum ex principiis immediate revelatis conclusiones deducens.

II. Dividitur ex parte subjecti in theologiam beatorum et theologiam viatorum.

[Theologia beatorum innititur lumine supernaturali gloriæ, et est duplex. Una quæ a S. Augustino vocatur cognitio matutina : est ipsa visio beatifica, qua beati clare vident in Verbo omnia divina mysteria; est essentialiter intuitiva, quia in ipso actu permanenti visionis consistit. Altera vocatur ab eodem Augustino cognitio vespertina :

N. B. — *Additiones nostræ inter uncos hujusmodi [] includuntur. — Omnes annotationes positæ infra paginas fuerunt a nobis additæ. — P.-F. E.*

ea est qua beati ex principiis lumine gloriæ in essentia divina cognitis seu visis dœducent, vi luminis naturalis, conclusiones circa divina mysteria, easque cognoscunt vel per species a Deo infusas, vel proprio labore partas in via; est discursiva formaliter, nec substantialiter differt a nostra, quam claritate tantum superat. Theologia viatorum ea est cui in præsenti statu studemus, *dum peregrinamur a Domino*, II Cor., v, 6 : conclusiones suas, vi luminis naturalis, ex principiis fidei immediate revelatis dœducit.]

Ex parte objecti dividitur in speculativam, quæ sistit in sola consideratione rerum divinarum, ut est mysterium Trinitatis, Incarnationis, etc., et practicam seu moralem, que disserit de rebus ad directionem morum pertinentibus, ut de Actibus humanis, Peccatis, Legibus, etc.

Ex parte modi dividitur in positivam, que tractat de rebus divinis stylo fusiori, elegantiori et quasi oratorio, atque regulis dialectices minus accommodato¹; et scholasticam, quæ de iisdem rebus tractat dicendi genere magis conciso, subtiliori et accuratiori, secundum regulas dialectices, terminos exponendo, statum questionis aperiendo, definiendo, dividendo, syllogisando, objecta dissolvendo, etc.².

Hinc habes Theologiam positivam et scholasticam non differre inter se essentialiter et penes objectum, idem enim habent, sed accidentaliter tantum, penes diversam methodum: eosque hallucinari qui theologiam positivam reponunt in notitia veritatum revelatarum quæ continentur in Scripturis et traditionibus; scholasticam in deductione discursiva conclusionum ex veritatibus revelatis: sic enim theologia positiva non distingueretur a fide, nec esset theologia, ut patet ex ejus definitione. Vere ergo

1. Dicitar positiva, tum quia principia fidei ponit et supponit tanquam theses et positiones, potius quam probat; tum quia sacrae Scripturæ, traditiones, concilia, canones, etc., ex quibus procedit, sunt juris positivi. — 2. Dicta est scholastica, eo quod ejus methodus usurpetur in scholis et academiis.

discurrit positiva et ex revelatis alia infert et deducit, sed non ita accurate sicut scholastica, et in hoc tantum differunt.

Haec autem accuratior methodus primum usurpari coepit octavo saeculo a S. Joanne Damasceno; incrementum habuit saeculo duodecimo a Petro Lombardo, episcopo Parisiensi, qui ideo dictus est Magister Sententiarum, et tandem complementum saeculo decimo tertio a sancto Thoma, Doctore Angelico.

[Utilitatem, imo et necessitatem theologie scholasticae, contra ejus detrectatores et contemptores, supra sua auctoritate asseruit sancta Ecclesia. Inter alias propositiones Wielefi hanc damnavit concilium Constantiense, sess. viii: « Universitates, studia, collegia et magisteria vana garrulitate introducta sunt. » Non solum autem commendavit, sed etiam prescrispsit hujus methodi usum, pluribus decrepis quæ cum sequenti ab Honorio III lato perfecte concinunt: « Ad theologicæ professionis studium aliqui docibiles destinuntur, qui cum docti fuerint, in Dei Ecclesiæ velut splendor fulgeant firmamenti; ex quibus postmodum copia possit haberi doctorum, qui velut stellæ in perpetuas æternitates mansuri, ad justitiam valeant plurimos erudire: quibus si proprii proventus ecclesiastici non sufficiunt, praedicti necessaria subministrent¹. »]

III. De lege Dei ordinaria, præter scientias naturales, necesse fuit esse in Ecclesia doctrinam quamdam secundum revelationem, hoc est theologiam spectatam quoad substantiam, prout abstractit a positiva et scholastica. Quia homo ordinatur ad finem supernaturalem qui comprehensionem rationis excedit, et cum præ cæteris animalibus cognitione ducatur, debet hunc finem supernaturalem cognoscere, ut in illum suas intentiones et actiones dirigat².

1. Decretal. lib. V, cap. *super specula*, De magistris. — 2. Hic q. 1, a. 1, o. — Hujusmodi notamina indicant loca *Summae* ubi Doctor Angelicus quæstiones in hoc opere positas tractat et solvit.

Evidem iste finis potest cognosci per fidem, quando habetur, et Deus posset absolute absque ulla theologia illam infundere; sed, secundum communem divinæ prævidentiae cursum, fides nec haberi, nec propagari, nec conservari ac defendi potest absque theologia. Etenim fides, quæ juxta Apostolum est ex auditu, et auditus per verbum Dei, *I Rom.*, x, 17, gignitur, nutritur, defenditur, non per simplicem mysteriorum narrationem, sed per discursus, congruentias, exempla et varia alia momenta, quibus Scripturarum obscuritas elucidatur, Traditio probatur, mysteriorum credibilitas demonstratur, hæreticorum impugnantium cavillationes, astutiae et sophismata deteguntur et refelluntur; quod totum est proprium theologiae: unde Augustinus, libro XIV *de Trinitate*, cap. 1, dicit quod per eam « fides saluberrima, quæ ad veram beatitudinem dicit, gignitur, nutritur, defenditur, robatur. » Non est tamen necesse quenlibet hominem esse theologum, ut salvetur, sed sufficit ei fides quæ simpliciter profiteatur ea quæ omnibus sunt necessario credenda. Unde Augustinus, *ibid*: « Hac scientia, inquit, plurimi non pollent fideles, licet fide polleant, quæ sola sufficit. »

IV. Quantum ad theologiam scholasticam, in quam debachati sunt hæretici, et quam plus æquo deprimunt quidam theologi, si consideretur secundum se, est etiam necessaria in Ecclesia, et semper viguit ab ejus exordio: quia sic considerata nihil est aliud quam theologia secundum substantiam, quam mox dicebamus esse necessariam. Theologia enim secundum se est scientia, omnis autem scientia est argumentativa et in hoc sensu scholastica.

At, si consideretur secundum statum quem nunc habet in scholis, non est necessaria, cum Ecclesia diu steterit sine illa, est tamen admodum utilis: quia per hanc egregie fides gignitur, nutritur et defenditur, ut constat tum experientia tot insignium virorum qui eam feliciter adhibuerunt contra profanas hæreticorum novitates, tum ex ipsa natura accurata dialectices. Etenim dicere stylo conciso, simplici et aperto, resecata verborum prolixitate, terminorum æquivocationes tollere, statum quæstionis aperire et figere, definire, dividere, syllogisare, objecta

solvere, hæc, inquam, quæ sunt propria theologiae scholasticae, juvare ad veritatem suadendam et defendendam, nemo negabit.

Evidem Apostolus, *Coloss.*, II, 8, et sancti Patres passim improbat philosophiam, non secundum se consideratam, sed quatenus ea abutuntur homines in deceptionem aliorum et in fidei detrimentum, cui quandoque vult dominari¹.

Ea autem non usi sunt Apostoli et priorum sæculorum Patres², ut totum quod est fidei, totiusque mundi conversio, non humanæ potentiae aut sapientiae tribueretur, sed Deo; at, plantata et firmata fide, mundique conversione facta, voluit Deus quod et potentia sæcularis et sapientia sæcularis ad hujus Religionis finem inservirent, ut ostenderet mundum per fidei victoriam esse sibi subiectum, et quantum ad potentiam, et quantum ad sapientiam.

V. Theologia est vere scientia³, si quidem conclusiones deducat ex principiis certis et immutabilibus. Nec obstat quod careat evidētia actuali; ad rationem enim veræ scientiæ subalternatæ, qualis est theologia viatorum respectu theologiae beatorum, sufficit evdētia radicalis, seu quod procedat ex principiis manifestatis in subalternante et radicaliter per se notis: alias pauca essent demonstrationes, cum pauci sint syllogismi quorum præmissæ non sint probandæ per alias notiores.

VI. Objectum formale *quod* theologiae est Deus sub ratione deitatis⁴, quia est id quod principaliter et ratione sui attingitur a theologia, et ratione cuius cætera attinguntur. Objectum formale *quo* est revelatio virtualis et mediata, per quam distinguitur a fide, quæ revelationi immediatæ innititur, et a metaphysica, quæ solo lumine naturali procedit. Objectum autem materiale et adæqua-

1. S. Th. in cap. II *Coloss.*, lect. 2. — 2. Id., Opusc. LXX, q. 2, a. 3, ad. 1. — 3. Hic a. 2, o; in I *Sent.*, dist. 1, q. 1, a. 3, quæstiunc. 2. — 4. Hic a. 7, o; in I *Sent.*, 1, in *prologo*, a. 4.

tum, est id omne quod cadit sub revelatione virtuali et mediata.

VII. Theologia est habitus entitative naturalis, quia acquiritur studio humano, seu per actus naturales, ut experientia constat. Nec obstat quod principia ejus, nempe articuli fidei, et objectum ejus, scilicet Deus, sint supernaturalia: quia principia quae sunt articuli fidei non influunt in conclusionem, nisi remote et mediante discursu naturali; effectus autem magis sapit naturam causae proximae, quam remote. Similiter Deus non est objectum specificativum theologie, nisi ut substat revelationi virtuali, seu discursui naturali, sub qua ratione est formaliter quid naturale.

[Contradicet Contenson, ipse thomista, cum quibusdam extraneis, dicens quod « si theologia sit radicaliter supernaturalis, est etiam entitative talis. » Et id probare contendit haec dupli ratione: quod « objectum theologie est Deus consideratus secundum illas rationes quae superant omnem naturam creatam vel creabilem, uno verbo, prout cognoscitur a fide, quae utique fertur ad Deum ut auctorem supernaturalem; at vero theologia de Deo tractat sub lumine divine revelationis, nec aliis principiis, mediis aut motivis utitur, quam articulis supernaturalibus fidei¹. » Etiamsi objectum theologie et ejus principia sint supernaturalia, negari non potest ejus habitum humano studio, vel per actus naturales, acquiri, non vero supernaturaliter infundi. Unde verius videtur hunc habitum esse formaliter naturalem.]

VIII. Theologia, sive secundum habitum sive secundum actum, est certior quoad se aliis scientiis naturalibus, quia habet certitudinem ex revelatione divina falli nescia, in quam ultimate resolvitur². Scientiae autem naturales habent certitudinem ex lumine naturali rationis humanae,

1. *Theologia mentis et cordis*, præloq. I, cap. II, specul. 3. —

2. Hic a. 5, o.

quae, quamvis objectum circa quod versatur sit quandoque certissimum, est tamen per peccatum tenebris obvoluta et errori obnoxia: unde, licet in aliis possit esse major certitudo objectiva, non tamen subjectiva quoad se.

Quoad nos autem theologia non est certior aliis scientiis naturalibus: quia illud dicitur certius quoad nos, quod est magis intellectui proportionatum, illumque magis satiat et quietat; quod præstant scientiae naturales ratione evidentiæ, qua caret theologia, utpote revelationi obscuræ innixa.

IX. Conclusio theologica, qua talis, quamvis sit quoad se certior aliis scientiis naturalibus, non est tamen certa certitudine fidei, nec ad fidem pertinet; quia conclusio theologica, reduplicative qua talis, non est immediate revelata, nec solo fidei motivo inititur, sed est tantum virtualliter et mediate revelata in suis premissis, ex quibus per discursum humanum deducitur: unde illi assentimur, non præcise propter revelationem, sed quia lumine naturali percipimus esse connexam cum veritate revelata; fides autem seu certitudo supernaturalis fidei innititur soli et immediate revelationi.

Theologiam, secundum methodum scholasticam ad usum scholarum, præsertim thomisticae, antehac tradidimus in 19 tomos distributam, quæ, benedicente Domino, pluribus non displicuit; nunc, ut eorum et aliorum votis satisfiat, ejus Compendium tradimus, brevius in speculativis, quia minus necessaria, paulo latius in moralibus, quia magis necessaria. Accesserunt quarundam assertiorum vindicione contra unum et alterum neotericum impugnatores. Item adjecimus tractatu de Fide brevem dissertationem de præcipuis motivis credibilitatis Religionis Christianæ adversus hodiernos deistas. His utere, Lector, et vale.